

Murriali

'A me' bedda Murriàli
misa 'e peri du Caputu,
pi lu munnu si nn'è jutu
pi biddizzi senza uguali,

c'avi un Chiostru e 'na Matrici
ca su' propriu du' domanti
e 'na storia 'nteressanti
su cu' affunna i so' radici.

Trasu a Chiesa: luci l'oru,
viju marmura e culonni
tra prufeti e tra Madonni
e 'u cori si grapi, e goru.

Di dda 'ncapu nni talii,
Patreternu 'i Murriàli,
nni rimproveri lu mali;
cu to' occhiu nn'ammalii.

I pareti tutti d'oru,
i mosaici a culura
e ti jinchinu archi e mura
santi e àncili 'nto coru.

C'è l'Anticu Tistamentu
cu Abramù e cu Noè,
'a criazioni puru c'è
'ntra li stiddi e 'u firmamentu;

'a nascita du Bamminu,
i prodigi du Signuri
'a so' cruci, 'u so' duluri
e l'Apostuli 'ncaminu...

Trovi puru ddu Re Bonu
e nun manca re Luiggi,
ora tutti senza armiggi,
rilucenti, supra 'u tronu,

e 'a gran porta 'i Paraddisu,
chi t'immetti 'nta navata
quann'arresta spalancata,
e tu guardi, Cristu, 'nvisu.

Ma 'u tisoru cchiù ammucciatu
d'intra 'u Chiostru è la Funtana,
'ncelu l'arma si nn'acchiana
e, tu, arresti senza ciatu

ca ti canta, lu zampillu,
la canzuni di l'amuri,
mentri ascuti fraschi e oduri
e, d'aceddi, canti e trillu!

Murriali, terra mia,
a la genti chi ccà veni,
tu stanchizzi levi e peni
cu stu mari 'i puisia.

Stu ricordu, stu disìu
di biddizzi rinumati,
ti fa terra di li fati;
di cantàri 'un mi sazzìu!

È primavera

'A finestra era affacciata
'nta 'na fridda matinata
quannu 'u cori ancora spera
ca ritorna 'a primavera.
Ma sta festa da natura
pi vinìri ancora è dura,
ca 'nta l'acqua e nivarràti
tutti così su' gilati,
ca stu munnu va arriversa
e ogni ghiornu cchiù si sbersa.
Tuttu taci 'ntornu a mia
mentri acchiana la chiatà.
Ma du celu, all'impruvvisu,
c'un gran cantu all'aria stisu,
all'aricchi e all'occhi scinni
un gran volu fattu 'i pinnì:
Su' acidduzzi fora 'i niru
c'aggiustaru volu e tiru;
su' acidduzzi 'i primu volu
chi scinneru appena a solu,
e tra un ballu e un firriùni
si pusaru o finistruni.
Fannu un gitu 'nturnu 'ntunnu
pi virìri anticchia 'i munnu.
Sentu granni un ciarmullu
e vulari a frotta 'i viju:
tanta festa vonnu fari
a ua difficili campàri.
Sata 'n pettu stu me' cori
ca da scena assai nni gori,
sbattu i manu cu gran prèu

ca mi pari tuttu mèu.
Primavera è già vinuta
e stu cori mèu l'ascuta.
Quannu tuttu mortu pari
'un nni resta chi spirari;
'a spiranza 'un morì mai
nutricata 'i mali e guài.
Quannu 'ntornu c'è cchiù scuru
sta finennu 'u tempu duru.
Basta un cantu a primavera
pi ccà fari 'na gran fera;
basta un'ala, basta un volu
pi purtàrinni cunsòlu;
basta un niru, basta un ovu
di la vita pu rinnovu,
ca stu munnu 'un po' murìri
siddu avemu paci e firi,
ca da morti nascì 'a vita
e continua 'a gran partita.